

AKASHVANI (Kolkata)

Regional News Unit

Date: 21-01-2026

Desk in Charge :- SDG

Time: 7.35 A.M.

Compiling: Partha Pratim Mitra

DEO:- KB

NRT : Partha Pratim M.

Announcement :- আকাশবাণী /খবর পড়ছিঃ -

বিশেষ বিশেষ খবরঃ-

- ১/ রাজ্যে ভোটের তালিকার বিশেষ নিবিড় সংশোধনী তদারকির জন্য আরো ১২ জন রোল অবজারভার নিয়োগ করেছে নির্বাচন কমিশন। # SIR প্রক্রিয়ার পরবর্তী ধাপে গতকাল থেকেই CEO মনোজ কুমার আগরওয়ালের তদারকিতে শুরু হয়েছে বিশেষ পর্যবেক্ষণ।
- ২/ SIR নিয়ে রাজ্যের বিভিন্ন এলাকায় সাম্প্রতিক অশান্তির প্রেক্ষিতে রাজ্যপাল সিভি আনন্দ বোস হিংসা রুখতে প্রশাসনের উদ্দেশে ১৫ দফা পরামর্শ দিয়েছেন।
- ৩/ SIR নিয়ে গুনানি নিয়ে হয়রানির অভিযোগে জেলায় জেলায় বিক্ষোভ অব্যাহত।
- ৪/ বেলডাঙায় সাম্প্রতিক অশান্তির প্রেক্ষিতে ঐ জেলায় থাকা ৫ কোম্পানি কেন্দ্রীয় বাহিনীকে সেখানে ব্যবহারের নির্দেশ দিয়েছে কলকাতা হাইকোর্ট।
- ৫/ ৪৯-তম আন্তর্জাতিক কলকাতা বইমেলা শুরু হচ্ছে আগামীকাল।
- ৬/ রাজ্যজুড়ে শীতের আমেজ থাকলেও বেড়েছে তাপমাত্রা।

রাজ্যে ভোটার তালিকার বিশেষ নিবিড় সংশোধনীর তদারকির জন্য আরো ১২ জন রোল অবজারভার নিয়োগ করেছে নির্বাচন কমিশন। প্রতিবেশী রাজ্য ও দিল্লীতে কেন্দ্রীয় সরকারের বিভিন্ন দপ্তরে কর্মরত আইএএস আধিকারিককে রোল অবজারভার হিসেবে দায়িত্ব দেওয়া হচ্ছে। নির্বাচন কমিশনের নির্দেশ অনুযায়ী, বিশেষ নিবিড় সংশোধন প্রক্রিয়ায় কোনো যোগ্য ভোটারের নাম যাতে তালিকা থেকে বাদ না পড়ে, তা নিশ্চিত করাই হবে এই পর্যবেক্ষকদের মূল দায়িত্ব। তাঁরা পশ্চিমবঙ্গের মুখ্য নির্বাচনী আধিকারিকের দফতরে অবস্থান করবেন এবং দাবিদাওয়া ও আপত্তি নিষ্পত্তি থেকে শুরু করে চূড়ান্ত ভোটার তালিকা প্রকাশ পর্যন্ত সম্পূর্ণ প্রক্রিয়ার ওপর নজরদারি চালাবেন। এই নিয়ে দফায় দফায় রাজ্যে মোট ৩৭ জন রোল অবজারভার নিয়োগ করা হল।

এদিকে, ‘ভোটার তালিকার বিশেষ নিবিড় সংশোধনী’-SIR প্রক্রিয়ার পরবর্তী ধাপে গতকাল থেকেই রাজ্যের মুখ্য নির্বাচনী আধিকারিকের দপ্তরে সিইও মনোজ কুমার আগরওয়ালের তদারকিতে শুরু হয়েছে বিশেষ পর্যবেক্ষণ। সদ্য নিযুক্ত চার স্পেশাল রোল অবজারভারের নেতৃত্বে চলছে এই নজরদারি পর্ব। সঙ্গে রয়েছেন ৪০ জন মাইক্রো অবজারভার।

এসআইআর নিয়ে রাজ্যের বিভিন্ন এলাকায় সাম্প্রতিক অশান্তির প্রেক্ষিতে রাজ্যপাল সিভি আনন্দ বোস হিংসা রুখতে প্রশাসনের উদ্দেশ্যে ১৫ দফা পরামর্শ দিয়েছেন। এর মধ্যে রয়েছে গোয়েন্দা নেটওয়ার্ক আরও বিস্তৃত ও শক্তিশালী করা, কেন্দ্রীয় ও রাজ্য গোয়েন্দা সংস্থা এবং স্থানীয় তথ্যসূত্রের মধ্যে সমন্বয় বাড়ানোর পাশাপাশি, আইন প্রয়োগকারী সংস্থাগুলিকে রিয়েল টাইম গোয়েন্দা তথ্য সংগ্রহ ও বিশ্লেষণের পরিকাঠামো গড়ে তোলা। বর্তমান সমস্যাগুলির গভীর অধ্যয়ন, জনমনে আলোড়ন সৃষ্টিকারী ইস্যুগুলির উপর বিশেষ নজরদারি এবং উত্তেজনার কেন্দ্রবিন্দু চিহ্নিত করার কথাও বলা হয়েছে। রাজ্যের বিস্তৃত আন্তর্জাতিক সীমান্ত জুড়ে কেন্দ্র ও রাজ্যের যৌথ গোয়েন্দা কাঠামো আরও কার্যকরভাবে গড়ে তোলা সহ আরও বেশ কিছু পরামর্শ দিয়েছেন রাজ্যপাল।

এসআইআর নিয়ে হয়রানির অভিযোগে জেলায় জেলায় বিক্ষোভ অব্যাহত।

উত্তর ২৪ পরগণার বারাসাত ব্লক দুই বিডিও অফিসে CPIM-এর স্মারকলিপি জমা দেওয়া নিয়ে ধুকুমার কাভ ঘটতে। অভিযোগ, শাসক দল আশ্রিত দুষ্কৃতীরা হঠাৎই রড, বাঁশ লাঠি নিয়ে তাঁদের ওপর চড়াও হয়। বেশ কয়েকজন আহত হলে তাদের বারাসাত মেদিক্যাল কলেজে নিয়ে যাওয়া হয়। জেলার সনদেশখালির ন্যাজাটে বিডিও অফিসে এস আই আর-এর শুনানি চলাকালীন ভোটররা বিডিও অফিসে ভাঙচুর চালায়। জেলার বাদুড়িয়া যদুরহাট কুলবেড়িয়া হসপিটাল মোড়ে হেনস্থার অভিযোগে রাস্তা অবরোধ করে বিক্ষোভ দেখায় গ্রামবাসীরা। বারাসাতের কাজিপাড়া এলাকাতেও একই অভিযোগে রাস্তা অবরোধ করা হয়।

অপরদিকে, পূর্ব বর্ধমানের খন্ডঘোষেও স্মারকলিপি জমা দেওয়াকে কেন্দ্র করে সংঘাতে জড়িয়ে পড়ে তৃণমূল কংগ্রেস ও CPIM-এর কর্মীরা। জামিয়াত উলেমা হিন্দ-এর তরফে'ও জেলাশাসকের দপ্তরে গতকাল স্মারকলিপি জমা দেওয়া হয়।

বাঁকুড়ায় SIR-এর শুনানির নামে সংখ্যালঘুদের বেছে বেছে হয়রানি করা হচ্ছে, এই অভিযোগ তুলে জেলাশাসকের দপ্তরের সামনে প্রবল বিক্ষোভ দেখায় জামিয়াত-এ-উলেমা-হিন্দ-এর কর্মীরা।

জলপাইগুড়িতে স্থানীয় এক মহিলা শুনানিতে হাজির হওয়ার পর, বাংলাদেশী তকমা দিয়ে তাঁর নথিপত্র গ্রহণ না করায় গতকাল BDO অফিসের সামনে তৃণমূল কংগ্রেস-এর কর্মীরা বিক্ষোভ দেখান। পরিস্থিতি সামাল দিতে ঘটনাস্থলে পৌঁছয় বিশাল পুলিশ বাহিনী। দক্ষিণ ২৪ পরগণার বাসন্তীতে রাজ্য সড়ক অবরোধ করে টায়ার জ্বালিয়ে প্রতিবাদ বিক্ষোভে সামিল হন এলাকাবাসী।

অন্যদিকে, শুনানির সময় সাধারণ মানুষের হয়রানির প্রতিবাদে কলকাতায় মুখ্যনির্বাচনী আধিকারিকের দপ্তরের সামনে প্রদেশ কংগ্রেসের বিক্ষোভ কর্মসূচীকে কেন্দ্র করে ধুকুমার বাধে।

সুপ্রিম কোর্টের নির্দেশ মেনেই পশ্চিমবঙ্গে এসআইআর-এর কাজ করতে হবে বলে মুখ্যমন্ত্রী মমতা ব্যানার্জি জেলাশাসকদের নির্দেশ দিয়েছেন। নবান্নে গতকাল

জেলা শাসকদের সঙ্গে মুখ্য সচিব নন্দিনী চক্রবর্তী বৈঠকে বসেন। সেই বৈঠকে যোগ দেন মুখ্যমন্ত্রীও।

ডিজিটাল পরিষেবার প্রসারে রাজ্য সরকারের উদ্যোগ আরও একবার জাতীয় স্বীকৃতি পেয়েছে। পশ্চিমবঙ্গ সরকারের ‘অনুমোদন’ নামে সিঙ্গল উইন্ডো ড্রাইভার অনুমোদন প্রদানকারী পোর্টাল, ডিজিটাল রূপান্তর সংক্রান্ত জাতীয় সম্মেলন ও পুরস্কার প্রদান অনুষ্ঠানে ডিজিটাল পরিকাঠামো এবং জন পরিকাঠামো উন্নয়ন বিভাগে শ্রেষ্ঠত্বের স্বীকৃতি লাভ করেছে। গত সপ্তাহে নতুন দিল্লিতে আয়োজিত ডিজিটাল ট্রান্সফর্মেশন সামিটে, ওই পোর্টালটির নির্মাতা ও পরিচালক রাষ্ট্রায়ত্ত্ব ওয়েবেল ইন্ডাস্ট্রি কর্পোরেশন লিমিটেড এর হাতে পুরস্কার তুলে দেওয়া হয়।

আজকের প্রসঙ্গ অনুষ্ঠানে আজ শুনবেন বিশেষ আলোচনা ' বিকশিত ভারতের লক্ষ্যে ব্যবসা ব্যবস্থার সরলীকরণ ' । বিশেষ অতিথি প্রযুক্তিবিদ তথা আর্থিক বিশ্লেষক সুদীপ্ত গুহ'-র সঙ্গে কথা বলেছেন কাশফিন নাহার। আকাশবাণীর সংবাদ বিভাগ প্রয়োজিত অনুষ্ঠানটি শুনবেন আজ রাত সাড়ে ৯ টায় গীতাঞ্জলি, DTH বাংলা এবং আকাশবাণী সংবাদ কলকাতার সোশ্যাল মিডিয়া প্লাটফর্মে।

প্রধানমন্ত্রী নরেন্দ্র মোদি, আগামী রবিবার ২৫-শে জানুয়ারি আকাশবাণীতে “মন কি বাত” অনুষ্ঠানের মধ্যে দিয়ে দেশ বিদেশের মানুষের সঙ্গে তাঁর চিন্তা ভাবনা ভাগ করে নেবেন। এটি হবে মাসিক এই বেতার অনুষ্ঠানের ১৩০ তম পর্ব।

আকাশবাণী ও দূরদর্শনের সব কটি চ্যানেলে সকাল ১১ টা থেকে এই অনুষ্ঠান শোনা যাবে। আকাশবাণীর সংবাদ ওয়েবসাইট newsonair মোবাইল app, আকাশবাণী ও দূরদর্শনের সংবাদ বিভাগ, প্রধান মন্ত্রীর e-দপ্তর ও তথ্য ও সম্প্রচার মন্ত্রকের youtube

channel- এও অনুষ্ঠানটি শোনা যাবে। হিন্দিতে মূল অনুষ্ঠানটির পর সম্প্রচারিত হবে এর আঞ্চলিক ভাষার তর্জমা।

ঝাড়খণ্ডে, মুর্শিদাবাদের পরিযায়ী শ্রমিকের অস্বাভাবিক মৃত্যুর ঘটনায় বেলডাঙ্গায় সাম্প্রতিক অশান্তির প্রেক্ষিতে ঐ জেলায় থাকা ৫ কোম্পানি কেন্দ্রীয় বাহিনীকে বেলডাঙ্গায় ব্যবহারের নির্দেশ দিয়েছে কলকাতা হাইকোর্ট। প্রধান বিচারপতি সুজয় পাল ও বিচারপতি পার্থ সারথি সেনের ডিভিশন বেঞ্চ গতকাল এ'সংক্রান্ত জনস্বার্থ মামলার শুনানিতে জানিয়েছে, কেন্দ্রীয় সরকার প্রয়োজনে NIA-কে দিয়ে তদন্ত করাতে পারে। এলাকায় যাতে শান্তি বজায় থাকে, তা সুনিশ্চিত করার দায়িত্ব জেলাশাসক এবং পুলিশ সুপারের। রাজ্য সরকারকে এব্যাপারে দুই সপ্তাহের মধ্যে হলফনামা জমা দিতে নির্দেশ দিয়েছে আদালত। সেখানে জানাতে হবে, কোথায় কত বাহিনী মোতায়েন করা হয়েছে এবং কিভাবে তাদের ব্যবহার করা হচ্ছে। পরের ২ সপ্তাহের মধ্যে মামলাকারীরা তাদের বক্তব্য জানাতে পারবেন। বেঞ্চ আরও জানায়, মুর্শিদাবাদের সাধারণ মানুষের জীবন, সম্পত্তি, নিরাপত্তা ও সুরক্ষা নিয়ে উদ্বিগ্ন আদালত। প্রয়োজনে কেন্দ্রের কাছ থেকে আরও বাহিনী চাইতে পারে রাজ্য।

উল্লেখ্য, বেলডাঙ্গায় অশান্তির ঘটনায় কেন্দ্রীয় বাহিনী মোতায়েনের দাবিতে কলকাতা হাইকোর্টে বিজেপি এবং স্থানীয় বাসিন্দাদের তরফে দুটি জনস্বার্থ মামলা দায়ের করা হয়।

বেলডাঙ্গায় অশান্তির ঘটনায় আরও ৫ জনকে গ্রেপ্তার করেছে পুলিশ। এই নিয়ে ধূতের সংখ্যা বেড়ে হল-৩৬। ফেসবুক পেজের ভিডিও থেকেই এদের শনাক্ত করা হয়।

অন্যদিকে, কলকাতা হাইকোর্টের রায়কে স্বাগত জানিয়েছেন, বিরোধী দলনেতা শুভেন্দু অধিকারী।

(বাইট- শুভেন্দু)

রাজ্যের বিভিন্ন সংস্থার তৈরি ৪৫ টি ওষুধের নির্দিষ্ট কিছু ব্যাচ গুণমান পরীক্ষায় ব্যর্থ হয়েছে। ইতোমধ্যেই সেই তালিকা প্রকাশ করেছে রাজ্য স্বাস্থ্য দপ্তর। গত মাসে নমুনা সংগ্রহ করে ল্যাবরেটরিতে পরীক্ষার পর পশ্চিমবঙ্গ ফার্মাসিউটিক্যালস-এর তৈরি রিঙ্গার্স ল্যাস্টেট স্যালাইন ছাড়াও হাওড়ার উলুবেরিয়ার লাইফ ফার্মাসিউটিক্যালস প্রাইভেট লিমিটেড এর তৈরি ক্রোমোস্ট্যান্ট ইঞ্জেকশন, জগাছার ডায়মন্ড ড্রাগস এর তৈরি ড্রায়েড অ্যালুমিনিয়াম হাইড্রক্সাইড, কলকাতার এক সংস্থা সানি ইন্ডাস্ট্রিজ-এর পটাশিয়াম ক্লোরাইড ও ওষুধ প্রস্তুতকারী সংস্থা ক্যাপলেট ইন্ডিয়া প্রাইভেট লিমিটেডের তৈরি ওরাল রিহাইড্রেশন সল্টস-ওআরএস-ও গুণমান পরীক্ষায় ব্যর্থ হয়েছে।

তালিকায় রয়েছে হিমাচল প্রদেশ, পাঞ্জাব, হরিয়ানা, উত্তরাখন্ড, গুজরাট সহ অন্যান্য রাজ্যের সংস্থার তৈরি ওষুধও। ইতিমধ্যেই খোলা বাজারে থাকা ওষুধগুলি তুলে নেওয়ার কথা বলা হয়েছে।

মালদার ইংলিশ বাজার, কালিয়াচক থানার পুলিশ গোপন সূত্রে খবরে তল্লাশি চালিয়ে গতকাল ১৫ টি আগ্নেয়াস্ত্র ও ২৫ রাউন্ড গুলি উদ্ধার করেছে।

গ্রেপ্তার করা হয়েছে মৈনুল হাসান এবং মহঃ আনারুল হক নামে দুই ব্যক্তিকে। তাদের বিরুদ্ধে বেআইনি অস্ত্র আইনে মামলা রুজু করা হয়।

গতকালই এই দু'জনকে মালদা আদালতে তোলা হলে, সাত দিনের পুলিশ হেফাজতের নির্দেশ দেওয়া হয়।

২০১১ সালের পর ৪৯-তম আন্তর্জাতিক কলকাতা বইমেলায় এবার অংশ নিচ্ছে চীন। তবে শেষ মুহূর্তে বাজেট সংকুলান না থাকার কারণ দেখিয়ে মেলা থেকে সরে দাঁড়িয়েছে মার্কিন যুক্তরাষ্ট্র। কলকাতা বইমেলা প্রাঙ্গণে গতকাল সাংবাদিক বৈঠকে 'পাবলিশার্স এন্ড

বুক সেলার্স গিল্ডের সাধারণ সম্পাদক ত্রিদিব কুমার চট্টোপাধ্যায় জানিয়েছেন, আগামী বৃহস্পতিবার বিকেল চারটেয় মুখ্যমন্ত্রী মমতা ব্যানার্জী, বইমেলায় উদ্বোধন করবেন।

(বাইট- ত্রিদিব)

সেখানে উপস্থিত থাকবেন এবারের ফোকাল থিম কান্ট্রি 'আর্জেন্টিনা'র বিশিষ্ট সাহিত্যিক গুস্তাবো কানসোলে, বিশিষ্ট সাহিত্যিক স্বপ্নময় চক্রবর্তী সহ বিশিষ্টরা।

রাজ্যজুড়ে শীতের আমেজ থাকলেও বেড়েছে তাপমাত্রা। আলিপুরে আজ সর্বনিম্ন তাপমাত্রা রেকর্ড করা হয় ১৫ দশমিক ৪ ডিগ্রি সেলসিয়াস, স্বাভাবিকের থেকে ১ দশমিক ৩ ডিগ্রি বেশি। গতকাল সর্বোচ্চ তাপমাত্রাও স্বাভাবিকের থেকে কিছুটা বেশি ছিল। আগামীকাল পর্যন্ত তাপমাত্রার পরিবর্তন হওয়ার কোন সম্ভাবনা নেই বলে আলিপুর আবহাওয়া দপ্তর জানিয়েছে।

দার্জিলিং জেলায় বিক্ষিপ্তভাবে হালকা বৃষ্টির সম্ভাবনা রয়েছে।
